



## Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

### Пренумерата в краю:

30 грошей місячно,  
50 „ „ квартално,  
1.50 „ „ полрочно,  
3 зл. рочно.

В Америкі: 1 дол. рочно.

В Чехословакии:  
2 кор. місячно, 10 кор. полрочно,  
20 кор. рочно.

### Ціны оголошень:

Ціла сторона 120 зл.,  $\frac{1}{2}$  сторони 60 зл.,  $\frac{1}{4}$  сторони 35 зл.,  $\frac{1}{8}$  стор. 20 зл.,  $\frac{1}{16}$  стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Контото чекове Нр. 404.155.

## В Москві закрыто церкви в страстну субботу.

Московскы власти зарядили закрыти в Велику Суботу всі церкви от год. 7. рано до год. 8 вечером. Заряджене таке отняло у людей возможность молити ся у гроба Христа Спасителя. Оно противоричит § 124. констытуции, котра „гварантуе свободу религии гражданам всіх исповіданий“.

Газеты подають, же московскы власти выдали таке заряджене прото, бо бояли ся, што може дойти до авантур меже людьми, молячи-

ма ся в церквах и коло церквей и безбожниками, принимаючими участь в первомайских демонстрациях.

Аж вечером о 8 години открыто Божы храмы и потягнули массы народа в сторону церквей. Тоты процесии віруючих с кошиками и пасхами в руках представляли чудачный вид на тлі первомайских плакатов и червеных прапоров.

—:—

## УКРАИНИ ГРОЗИТ ГОЛОД.

Газеты с Москвы доносят, же на советской Украині грозит голод, выкликанный планним станом пропшлорочных засівов и весняных засівов. Уж тепер зауважат ся великий недостаток пашы и колхозники бють статок и домашны птахи. Ціна масла подскочила на 25 рублей за 1 кильо. При заробках колхозников 90 до 250 рублей місячно ест то ціна страшно вы-

сока. Сельске населене масами хоче достати ся до міст, хоц и в містах бракуе провьянгов.

Разом с ростом цін провьянгов подносят ся ціны обутия и материялов. Скоряны черевикы коштуют 50—250 рублей, полотняны 80—120 рублей, а высокы скорні с холявами до 300 рублей за пару.

—:—

## Страшна езекуция проказных в Кытаю.

Кытайскы газеты с Кантону подають описе страшной езекуции, яку выполнено на 200 кытайцах, хворых на проказу.

В колыонии для проказных пребывало 215 проказных, котрых власти постановили позбыти ся. Всіх хворых заманено на 2 кораблі, говорячи им, же перевезут их до другого обоза, находячого ся на иншом острові. Проказны сориентовали ся, же хотят их потопити и шмарили ся на обслугу кораблей и завладіли ко-

раблями. Вточас начальство кораблей распочало с хворыма переговоры, котры довели до угоды.

Хворы згодили ся вернути до пристани, где приречено им, же будут поміщены в той колыонии, с котрой выіхали. Ту однак хворых выстріляно, а гдеяких недобитых посыпано вапном и похоронено разом с убитыма в одной великой могылі.

—:—

## До чого допровадил Росию коммунизм.

Каждый с нас знае о том, же Росия была перед войном шпихліром цілой Европы. Урожайна земля Сыбири и Украины давала так богаты вроды, же выстарчали они на пару літ; прото тыж с російских портов вывезено масу зерна до инших краев, а в внутрі державы был такий достаток, же по реставрациях и гостинницах каждый мог істи до волі хліба за дармо.

О той самой Росии пишут тепер, же пауе там голод. С року на рок поменьшат ся там соране поле, а в том році дошло до того, же всього обсіяно лем  $\frac{1}{3}$  часть поля, а решту оставлено на толоку.

Падат там также в застрашающий способ число коней, статку и безрог. И нич дивного, же ест там зле, бо всяди инде, як в урядах, фабрыках, копальнях и т. д. даст ся впрова-

дити 8-о ци 6-годинный день работы, але при сельском господарстві тоты мусит допровадити до банкротства.

Газда мусит робити вточас, як ест ку тому ответный час и не може недоборонити засіяного зерном поля, або оставити сухого сіна ци зерна перед дожджем на поли, — бо минула година работы.

Газда мусит нераз робити без отпочинку по 15 и больше годин денно, бо иначе наразил бы на втраты свое господарство. Але так робит он лем вточас, коли робит для себе и своей родины, — коли знае, же его тяжкый, мозолистый труд принесет ему самому користи.

На чужом и для чужих так робити не захоче и не буде. А в Росии тепер газда має робити именно не для себе и не для своей родины, бо там вишиткы грунты перешли на державу и никто не може мати своего власного грунту, своей власной загороды. Там всі грунты, находячы ся на терені великой державы, перешли на власность той державы, а всі давны селяне-газдове стали ся роботниками.

Тоты давны властителі грунтов, котрым отобрано их землю и котрых замінено в бездомных роботников, не могут робити так старанно, як робили давнійше для себе, занедбуют ся в роботі и тоты допровадили Росию до того, же тоты краина, котра своим зерном могла бы выкормити людей с цілого світа, не має тепер хліба для своего населеня. До того допровадил Росию коммунизм.

Але по што пише ся тоты вишиткы? Што-ж може нас обходити зла господарка в инших краях? Ой обходит нас тоты и то дуже, бо и у нас агитация коммунистичных агентов опановала многы организации роботников по містах и фабрыках и поволы переносит ся на села. Облегчуе им роботу в великой мірі нужда на селі и тіснота грунту.

Але хлоп мусит мати свой власный, здоровый розум и не позволити баламутити ся ріжным коммунистичным агитаторам, бо лучше ест мати, хоц бы и мало, але своего власного поля, як быти роботником на чужом грунту, котрый в случаю опанованя краю через коммунизм, стал бы ся власностью державы.

—:—

## Пьянство причиною всяких злочинов.

Професор Вахгольд собрал цікавы цифры, котры выказуют, же найчастіше причиною убийств и всяких инших несчаст ест пьянство, распуста и горілка.

В Росии в часі войны, коли заказано в загалі продавати всякы напитки, число злочинов поменьшало ся аж о 90 процент. В полицийных арестах было пусто, а и в вязницах судовых не было вязней.

Як в Единбургу закрыто шинкы, число преступников дораз в першом році змаліло с 1357 до 223.

В Польщі, ведля статыстыкы, 80 процент преступлень и злочинов ест пополненых при пиятыці, або под впливом алкоголя. Причина ест ясна. В затрутом через алкоголь мозгу слабне воля, счезат почуте ответственности, берут верх низкы инстинкты. Повстают за давнены, або и выимагинованы уразы, ненависть и жажда мести и родит ся злочин.

Поколіне алкоголиков, то переважно психопаты и выродкы психичны и моральны. Найгрозніиши бандыты, то не лем пиякы, але и сыны пияков. Клясычным приміром може быти славный дюссельдорфский вампир Куртен, котрый мал на своей совісти численны убийства и инши злочины. Был он сыном ноторычного пияка.

Др. Пулавский выписал, чим были на-

слідники одной пияцкой родины. Отец пияк и мати пиячка. Через 4 поколіня было в той родині 26-еро людей. В том числі было 5 пияков, 3 бортаковатых, 4 венерычных, 2 вариатов, 3 истерычки, 4 преступников и 4 водоголовых. Разом 25-ох наслідников ненормальных, а лем оден здоровый.

\* \* \*

Німецка служба здоровья подае цікавы цифры, в яких днях тыждня припадат найбільше злочинов. На 380 злочинов пополненых в 1 році в Дюссельдорфі, припадат 168 на неділю — день забав и пиятыкы; 68 злочинов пополнено в понеділок, бо по пиятыці приходит до смутных родинных розрахунков. Во вторник, середу и четверг — мало злочинов, а в пятницу наименьше, бо лем 17. Нич дивного, бо люды робят, а с битком ждуть на субботу, день выплаты работников. На тот день припадат аж 62 преступленья.

С тых приміров видно, же горілка и пиятыка веде людей до згубы и несчастья. Понятно, алкоголь шкодит найбільше организмови дітей. Прото тяжко кривдят свои діти тоты легкомысленны родичи, котры позваляют дітям, а не раз аж и сами им дают пробовати горілку, або инши напитки.

—0—

## До чого депроваджат любов.

Дочка одного с найбогатших промышленников болгарских Панчева, познакомила ся перед 6-ома місяцями в Софиис бідным хемиком Милорадом Дандуковым.

Одыначка богача именован Божилика полжила горячо хемика. Але Дандуков был бідный и жил с невеликих доходов своей матери, котра была вдовом. Жил на передмістю и проводил час на безчисленных хемичных експериментах.

Божилика была красна и романтична. Сказала она Дандукову, же ей отец ест достаточно богатый, штобы помочи молодому супружеству. Отец однак заявил дочері, же вынаход Дандукова не має жадной вартости ани торговельной, ани научной и не позволил ей встрічати ся с Милорадом.

Божилика рішила помстити ся на отці и урядила штрайк голодовый. Другого дня голодовкы Панчев призвал наилучших лікарей Софии, котры подняли ся таким ци иншим способом кормити одыначку богача. Божилика признала себе за побіджену, але не резыгновала однак с мести.

Наконец придумала она мечь страшну, достойну ей великой любви. Написала лист до отца, в котром заповіла ему, же не прорече до никого ани одно слово так долго, покаль не побере ся с любимым.

Панчев не брал початково поважно ей угроз, уважаючи того за каприз. Помылил ся однак. Божилика не прогварила от того часу ани слова и не хотіла ся с никым видіти. С родичами и со службом бесідовала на мигы. Просьбы и угрозы отца нич не помогли. О ей штрайку бесідовано в цілой Софии.

Панчев наконец уступил. Постановил отнайти Милорада. Показало ся однак, же мати его умерла, а он сам выїхал с Софии. До тепер не нашла его полиция, ани вынанаты прыватны детективы.

А красна Божилика не хоче перервати молчаня. Прорече перше слово, коли в дверях

ей комнаты стане Милорадо. А того не могут найти и не знати, ци и коли найдут одынокого человека, котрый може перервати штрайк молчаня богатой болгаркы.

## Миллионы добыты пястуком.

Сут люды и тепер, котрых Бог обдарил великом силом и они пястукими добывают маеток. До таких належит в першом ряді американец Тунней. Мае он не лем здоровы пястукы, але здоровый розум. Прото тыж знал, коли зняти мундур моряка американской военной флоты и выступити на рингу, тому потрафил он выробити собі в своей отчизні такую популярность, же именовано его поручником марынаркы, а Нью-Йорк надал ему почетне гражданство, тому то выборол он собі пястукими красный маеток в сумі понад 2 миллионы долларов и тому он — сын бідного работника — оженил ся с внучком богатого банкиера.

Кромі того знал он, же лучше выцофати ся с рингу в полні славы, яко николи непобідженный боксер. Однак не лем прот ест Тунней мудрым человеком. Он, хоц самоук, росширил свои знаня до той степени, же уходил за спеца в области діл штукуы, а оден универсытет запросил го своего часу до выголошения отчитов о творчестві Шекспира.

Тунней пробовал также писати и великы американскы издавництва хотіли му добре заплатити за друк его памятникы, але он волил их выдруковати власным коштом.

По Европі їздит Тунней для приятности, оглядаючи головно галерии образов и театры. Подорожуе, як магнат и где лем ся покаже, его величезный рост и кольосальны пястукы, звертают на него загалну увагу, особенно тому, же мае он незвычайно добру товариску огладу.

В Америкі Тунней разом с родином т. е. с женом и трима малыма дітьми, с котрых наймолодше мае лем 1/2 року, жив на маленьком прибережном острові, котрый закупил цілий и переобразил на напавду чародійску закутину.

На рингах уж не выступат, але бокс управят для себе и каждого дня, аж и в часі подорожи, не занедбуе вправ. Не думат уж о публичных выступлениях, бо повідат, же яко 38-літний мужчина ест уж за старый и не хоче втратити свою славу, котру здобыл в 58 мечах.

## Борба со щурами.

Щуры могут ся стати великим несчастьем для газды, бо розмножуют ся барз скоро. Они розносят также такы хвороты, як чума, холера и трыхина у свиней. Одна пара щуров може дати рочно около 800 штук потомства, котры в році с'їдят около 600 сотн. зерна.

В приморских портах щуры розмножили ся так численно, же выряджают они величезны втраты и не можна их ничим выгубити. Пробы выбитя их бомбами або вытруты также мало помагают, бо щуры все на час выносят ся в друге місце. Борба с нима ест трудна, бо они сут недовірчивы и осторожны. Прото тыж и трутку оминают они и не принимают ей.

Штобы успити их осторожность, треба давати им через якийси час корм нпр. дост рідкы терты картофлі. Коли щуры через пару дней с'їдают картофлі, можна до них додати труткы нпр. морску цыбулю.

Штобы не потрули ся том трутком куры, добре ест зробити с досок малу скриночку с отворами по обох боках, штобы щуры могли ся помістити и до такой скринкы давати трутку. Таксамо можна вытрути и мыши.

## Як отзвычаити коня от кусаня.

Каждый селянин знае, якы то клопоты сут с конем, котрый кусат. Навычка тот ест спричинена найчастіше злым и неумілым обходженем ся с конем, хоц быват часом и наслідственна.

Кусаючи коні стают ся часто причиною несчастья и неоден газда заплатил уж за шкоды и втраты, выкликаны послідствиями укушения через коня.

От той навычки ест барз трудно отучити коня. Бите коня, або выпыхане ему до пыска горячей морквы ци солонины нич ту не поможе, а може лем попечи язык коневу.

Скорше можна отучити коня кусати при помочи смердячого мяса. Як відомо, конь мае барз добрый нюх и не переносит смердячого мяса. Прото, подходячи до кусающего коня, належит мати набитый на патык кусок сильно вонячого мяса. Конь в таких разях забыват о кусаню и отвертат голову. Парукратне повторене такого досвіда може отучити коня совсем от злосливого кусаня.

Способ ест недорогой и каждый може его выпробовати.

КУПЮ ВЕЛИКУ ИЛЮСТРОВАНУ БИБЛИЮ

О. МАЩАКА.

Адресовати до администрации „Лемка”  
Крыница.

## КОМУНИКАТ В справі правних приписов в стрейфі надграничной.

В Дневнику Законов Р. П. Ч. 12. поз. 84. с дня 22. II. 1937. р. появило ся заряджене Министра Справ Внутр. с 22. I. 1937. р. в справі выконання зарядж. През. Р. П. о границах Державы с дня 23. II. 1937. р. (Дн. З. Р. П. Ч. 11. поз. 83. с р. 1937).

Понеже заряджене тото вводит ряд ограничень в многих місцевостях повіта новосандецкого, а особенно в стрейфі надграничной, обнимающей місцевости: в гмині Тылич — громады: Тылич, Мушинка; в гмині Мушина — громады: Войкова, Дубне, Лелюхов, Милик, Андреевка, Жегестов, часть міста Мушины, часть міста Пивнична; в гмині Пивнична — громады: Зубрик, Верхомля Велика (часть), Ломница (часть), прото подае ся до відома, же:

1) каждый, кто стало або часово жие в надграничной стрейфі, т. зн. в выже вычисленных місцевостях, ест обовязанный мати личну легитимацию (довуд особісты), выставлений через Заряд Городский або Гминный (кроме дітей до 13 літ) в термині не позднійшом, як до дня 22. мая 1937. р.

2) Люды, котры хотят поселити ся в приграничной стрейфі, мусят одержати на тото позволене Староства. Припис тот не обовязуе польских граждан, котры жиют што найменше от дня 22. жолтня 1936. р. в місцевостях, лежащих в приграничной стрейфі, маючих в приграничной стрейфі нерухомый масток и не жиючих в нем, а также членов родин людеи выже вычисленных, жиючих с нима в одном домашном господарстві, если ходит о пребываніе на пространствах, вычисленных в этих точках. Также не обовязуе тот припис державных и самоуправных урядников, вояков в чинной службі и членов их родин.

3) Рух особовый в пасі граничной дороги ест забороненый. Заказ тот не дотычит дорог перерізуемых пас граничной дороги и ведущих непосредственно до переходов на граничных пасах. Властители грунтов, положенных в пасі граничной дороги и члены их родин, жиючи с нима в одном домашном господарстві, а также работники стало у них затруднены, могут пребывать в пасі дороги граничной в часі от всходу до западу сонца в цілях господарских и фаховых. Ограничения тоты не дотычат урядников державных и самоуправных, а также вояков в чинной службі, если они пребывают в пасі граничной дороги в справах службовых на основе выставленных делегаций або посвідок, а также людеи, управнених до рыболовства и ужиткования граничных вод, котры мают позволене Староства.

4) Стреляне с пального оружия в приграничной стрейфі ест заборонене. Заказ тот не дотычит уживания пального оружия в цілях службовых, в цілях школьных и спортивных на стрільнищах, а также в часі ловов.

5) Ловы в приграничной стрейфі без специального позволения Староства сунт заборонены. Позволения будут выдаваны одноразово и часово. Люды, котры будут мати часовы позволения, сунт обовязаны повідомити за каждым разом о наміренію урядженя ловов, што найменше на 12 годин передом, найблизший постерунок сторожи граничной. Позволения не дают права польовати на терені близшом як 200 метров от границы.

6) Уживане выбуховых материалов для цілей господарчих в приграничной стрейфі, независимо от инних ограничень, выплываючих

с приписов, ест дозволене лем по попередном повідомленію, што найменше на 24 годин постерунку Сторожи граничной.

7) Посідане всякого рода фотографических аппаратов а также роблене знимок фотографических и фильмовых на терені приграничной стрейфы, без специального позволения Староства, ест заборонене. Заказ посіданя фотографических аппаратов не дотычит людеи переїздяючих без задержаня ся через терен приграничной стрейфы.

8) Посідане в приграничной стрейфі всякого рода аппаратов, урядженъ и инних средств, даючих возможность porozumlenя ся на отдалъ (нпр. телефон, телеграф, радио и т. п.) кроме аппаратов радифонических отбрательных, вымагат специального позволения Староства, независимо от позволенъ других властей, вымаганных через отвітны приписы. Также вымагане ест позволене на ховане всякого рода голубов. Не дотычит тото однак урядов и органов державных и самоуправных, а также підприємств державных. Если иде о ховане голубов, то не дотычит тот припис людеи ведучих годовлю в porozumlenію и под присмотром войсковых властей.

9) Рыболовство в водах граничных, добыване материалов с корыт tych вод, а также плаване на tych водах, вымагат специального позволения властивого Староства, без огляду на місце ловлі и распочатя плаваня на граничных водах.

10) Псы на терені граничной стрейфы мают быти держаны и ведены все на увязи, если не находят ся в кругу мешканъ и забудованъ господарских так замкнених, або огороженных, же не дают возможности выдостати ся псу на вні. Припис тот не обовязуе овчарских псов, перезначеных до стереженя статку, а также псов ловецких, если сунт зголошены в Старостві и заосмотрены в отвітны ознаки и товаришат стрільцам и пастухам, а также псов службовых, належаючих до органов безопасности и охороны границ.

**Приписы тоты обовязуют от дня 23. квітня 1937. р.**

Обовязок приписов §§. 1. и 2. зарядженя Мин. Справ Внутр. с 22. I. 1937. р. (Дн. З. Р. П. Ч. 12. поз. 84) относячих ся до ограничень в купні нерухомостей в граничном пасі (в цілом повіті новосандецком) через польских граждан, был отложеный через Мин. Справ Внутр. до дня 1. липня 1937. року. Дотычне заряджене появит ся в найблизших днях в Дневнику Законов Р. П.

### КРЕХКЫ КОПЫТА У КОНЕЙ.

У коней случат ся часто, же мают крехкы копыта. Рог ломит ся легко и отпадат кусками, што не лем брыдко выглядат, але и утруднят куте коня, при том подковы часто отпадают и губят ся.

Добрым ліком на тото ест лянолина, котру можна купити в каждой аптыці. Копыто треба передом вымыти с броду чистом, холодном водом, обсушити, а коли копыто ест уж совсем сухе, втерати в копыто и в корону через 2—3 минут лянолину. Так поступати треба каждого дня через 5—6 неділь. Результат буде напевно добрый. В часі курации наилучше не кути коня.

Памятати лем треба о одном, жебы што 3—4 тыждней вырашпыловати належито роги копыт от стороны подставы.

## Комуникат В справі войсковых вправ.

В текучом року будут покликаны на звычайны войсковы вправы тоты подофицеры и воякы, належащи до резервы, котры достанут именны карты покликаня.

Покликаны на войсковы вправы могут с важных причин, як нпр. смерть и несчастье в родині, або с других важных причин одержати пересунене часу отбытя вправ на термин позднійший, як тот, котрый назначено им в карті покликаня.

В таком случае належит внести просьбу через Староство до той Повітової Коменды Дополнень, котра выполнила карту покликаня и то найпозднійше на 4 тыждні перед термином распочатя войсковых вправ. Близши информации сунт оголошены в обвіщенях, вывешеных в каждом селі.

### Ціны пшеничной муки и збожевой кавы в повіті новосандецком.

На основе уповажненя Воеводы Краковского с дня 14. XII. 1935 (Дн. Воев. Ч. 29, поз. 158) и по выслуханю опинии Пов. Комисии для баданя цін, установил Староста Новосандецкий ниже поданы ціны с важностью от 1-го мая 1937. р.:

	В пов. новосандецком:		В Крыніці и в Мушині:	
	За 100 кг (гурт) зл.	За 1 кг (детайль) зл.	За 100 кг (гурт) зл.	За 1 кг (детайль) зл.
пшенична мука 65%	47	0,52	48	0,53
збожева кава	—	0,60	—	0,60

Кто буде жадати, або брати вышши ціны, буде каранный по мысли Росп. През. Р. П. с 31. III. 1926. р. (Дн. З. Р. П. Ч. 91, поз. 527) грошевом каром до 3.000 зл., або арестом до 6 тыждней, або обома карами разом.

### Ціны муки и хліба в повіті новосандецком с важностью от 26. квітня 1937. р.

На основе уповажненя Воеводы Краковского с дня 14. XII. 1935 (Дн. Воев. Ч. 29, поз. 158) и по выслуханю опинии Пов. Комисии для баданя цін, установил Староста Новосандецкий ниже поданы ціны с важностью от 26. квітня 1937. р.:

	в повіті:		в Крыніці и в Мушині:	
	гурт зл.	детайль зл.	гурт зл.	детайль зл.
мука житна 70%	36,5	0,40	37	0,41
мука житна 95%	30	0,33	30,5	0,34
хліб житн. с 70% муки	—	0,35	—	0,36
хліб житн. с 95% муки	—	0,29	—	0,30

Кто буде жадати, або брати вышши ціны, буде каранный по мысли Росп. През. Р. П. с 31. III. 1926. р. (Дн. З. Р. П. Ч. 91, поз. 527) грошевом каром до 3.000 зл., або арестом до 6 тыждней, або обома карами разом.

### ЩТОБЫ ЛАМПЫ НЕ КОПТИЛИ.

Лампы не будут коптити, ани выдавати неприятного запаха нафты, а при том будут світити ся ясно, если на 1 л. нафты даме малу ложочку соли.

ПОМІЩАЙТЕ  
ОГОЛОШЕНЯ  
В ГАЗЕТІ „ЛЕМКО“.

## Що чути в світі.

**Америка буде новы военны кораблі.** Адмирал войск американских зажадал от комисии до справ морских военных сил позволения на будову шестох новых военных кораблей, котрых кошт вынесе около 48 миллионов долларов.

**Италияны предсказуют нову світову войну.** Дня 5. мая в италянском парламенте выголосил бесіду вицемиистер войны Парияни, котрый заявил, же европейский конфликт може переініти ся в світову войну и Италия мусит быти до войны приітовлена. Тому италянський военный промысл старат ся зреализовати плян дополнения сил морских, авиацийных и техничных.

**Німый промовил.** 20-літний Петру Урсовици с села Маргита в Семигороді, утратил перед пару роками мову. Помимо того однак научил ся читати и писати и был терминатором у слесара. Недавно майстер выслал немову до одного підприємства, где загнул ключ и треба было отворити касу. Там увиділ Урсовици урядничку того підприємства, дівчину незвычайно красну.

Вид красавицы так потряс немовом, же промовил. Случай тот заинтересовал лікарей. Они збадали Урсовициого и пришли к заключению, же был он німым не с причины ганчу голосовых струн, лем прото, же горляны нервы не діяствовали. Под впливом зворушения нервы задрожали и ожили — и німый промовил.

**Трующий газ замінит землю в пустыню.** С Москвы доносят, же советскы учены вынашли новый трующий газ, котрый має страшечны свойства. Газ тот назвали: „рой смерти“. Ест то теч фиолетовой барвы. Аж и найбарже роспущеный в воді, заперат он совсем отдых и вызыват опарене на цілой скорі. Земля, скроплена тым газом, стае ся неурожайна на долгы літа.

Новый газ ест значно сильнійший от вынайденого давнійше иперыту. Бомба, наполнена тым газом, на великом пространстве забиват всі живучи существа и замінят урожайну землю в правдиву пустыню. Дотеперешны противгазны маски, лем на короткий час хоронят перед удушением. Перши досліды с тым газом зроблено на людях под Москвом. В той ціли с вязницы на Лубянци перевезли чотырох политычных вязней и запроваджено до мурованой пивницы, где пак шмарено ампулку с новым газом. Результат был страшный. В неполной минуті всі они умерли от удушения.

**Пашпорті до неба.** Газеты льондынскы доносят, же от долшого часу грасуе в полудневой Африці банда ошустов, котра в небывалый способ вызыскуе дітинячу легковірность муринов. Члены той банды ходят по муринских селах, представляют ся, яко мисионары и продают муринам пашпорты до неба.

Пашпорты такы выставляют ошусты на друкованых формулярах, оправляют в барвны окладинкы и заосмотрюют в печаткы. До пашпортов вклююют фотографии муринов, для котрых пашпорты сут перезначены. Ошусты кажут собі солено платити за пашпорты и увіряют ошуканых бідаков, же с таким пашпортом трафят напевно до неба, где на вікы ві-

ков будут мати дост ідла и забавы и где будут жити с ангелами.

**Безплатный готель.** В місті Рочестер в Англии ест невеличкий готель, котрый можна бы без переседы назвати найлучшим на світі. В готелю там не платит ся ани за спане, ани за вечерю, ани за снідане. Наоборот, каждый, кто выходит с того готелю, достае на дорогу ище оден шиллинг. Одинокий тот на світі готель называт ся: „Дом для подорожных Ричарда Уатса“. Основано тот дом в 1579. р. за гроши, якы на тоту ціль жертвовал місцевый богач Уатс. До тепер готель тот держит ся с процентов от зложеных богачем грошей.

Готель ест небогатый, але выгодный. Безплатны гості находят там таку саму облугу, як и в найлучших английских готелях.

Шкода, же такый готель ест в Англии и шкода, же ест лем оден на світі. Жебы так были такы готелі в каждом місті, можна бы легко подорожовати по прекрасном світі.

## Вісти с краю.

**Лига Охороны Звірят во Львові** постановила основати во Львові ратункову стацию для звірят. Такы стации сут уж во многих містах Европы и даюот они помоч хворым и раненым звірятам, штобы они не мусіли ся мучити долго. За приміром Львова повинни ити другы міста, особенно тоты, в котрых звірята помагают людям в роботі и сут часто кормителями людей. В загалі у нас оказуе ся за мало чувства для домашних звірят. Часто бе ся их и мучит, хоц звірята сут правдивым приятелем человека.

**Найбольший дом в Польці.** Напевно найбольшим домом в Польці ест мурованный червоный дом, положеный при ул. Гурчевской под ч. 15. Жие в том дому 1.790-еро люда. Праві всі жителі того дома — то роботники, ремесельники и низши урядники. Люды живучи в том домі маюот 450 дітей. Такого числа жителей и числа дітей не має не одно село, а навіт сут и місточка, котры маюот своего бурмистра, уряд, школы и т. д., а не маюот только людей.

**Хотіли перекупити судию.** Франц и Викт. Тылицакы мали справу цывильну в суді в

Мушині. Они хотіли забезпечити собі користный вырок и написали до судии д-ра Рахвала просьбу, штобы их переслухал прыватно. До просьбы приложили банкнот 20-злотовый.

Судия д-р Рахвал повідомил о том прокуратора, котрый выготовил Тылицакам акт оскарження.

**Варшавский жебрак — богачем.** В шпиталі в Варшаві номер 69-літний жебрак Зисман Смаковский.

По его смерти выявило ся, же оставил он дві великы каменницы. Крім того стверджено, же провадил он двоякый трыб життя. Коли занимал ся жебранином, то одівал ся в подерты лахманы, а як выходил на місто в справах гандлевых, был все галянтно одітый. Смаковский оставил величезный масток в вартостевых паперах, векслях и чеках. Не мал ниякой родины.

На вість о смерти короля жебраков, діды постановили урядити ему похорон.

**Кайновый злочин.** В одном селі волковыского повіта Игн. Качко повадил ся при розділі мастку со своим братом Бенедом и сестром Надеждом и ударил брата и сестру со кыром. Бенед умер, а сестрі отрубал палец у правой руки. Преступного брата арестовано.

**В Лодзи и коло Заліщик откопано шкелеты мамутов.** При ул. Вапенной в Лодзи в часі копания каналов, отнайдено полный шкелет мамута.

Мамут то величезный допотопный звір, подобный до слона, с подобными до него кликами, але значно от него больший.

Масы людей згромадили ся, штобы видіти тот рідкий оказ. Шкелет зложено старанно и отослано до музея.

В том самом часі найдено коло Заліщик, недалеко румунской границы также решткы мамута, але уж не цілого, а также кости волохатого носорога. Откопано их в копальных гипсу и отослано также до музея.

Такы звірята жили на наших землях барз давно, — десяткы тысячей літ. Гдекади, як видно с тых двох случаев, законсервовали ся под земльом и переховали ся до тепер.

—:—

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ

ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО.

НЕХАЙ ЯКНАЙСКОРШЕ

**за асекуруе ся  
в асекураційном Товаристві  
ВИТА И КРАКОВСКЕ  
во ЛЬВОВІ**

Асекурацію принимают на цілой Лемковщині  
представителі: гг. Осиф Ямовицкий — Крыница - Село  
и Михаил Перелом — Сянок.